

568985

欽定剿平三省邪匪方略

正編

一〇九

新刊本草綱目

卷五

一
五

欽定剿平三省邪匪方略正編卷一百五十三

辛酉年

五月初二日

丁丑

陸有仁奏言連日據探報賊匪

冉學勝一股由甘肅靈臺竄至隆德固原一帶

經畧額勒登保恐其闌入北山當與督臣長麟

分路兼程兜截賊匪遂由華亭折回隴州向西

南奔竄闌入寶雞經畧大兵現在馳赴益門鎮

大灣舖一帶截擊並調省城滿兵一千三百名

鄉勇一千名令副都統祥保遊擊薛國相帶赴鳳翔一帶保護平原長麟自隴州長寧駟跟蹤追剿又伍逆餘匪一股人數亦已無多提督楊遇春同總兵穆克登布由留壩武關分路兜剿並另派兵在三岔坪扼截擒殺數十人該匪自褒城縣九條灣竄入沔縣芳埡子等處楊遇春等現由大石巖張家河一帶分兵三路進剿又

高見奇賊匪一股前經慶成擊敗後復竄至盤
屋大澗溝黃柏園一帶經通判雒昂帶領鄉勇
趕到乘夜圍剿殺賊二百餘名生擒數十名奪
獲長矛八十餘桿次日又追及賊衆擒殺三十
餘名該匪晝夜狂奔由北星溝至棧道黃牛舖
向西奔竄雒昂現與總兵劉之仁分路追截慶
成帶兵馳至華陽隨探隨進以遏其折竄之路

又平利安康一帶零股賊匪由洵陽縣大金河
向白河縣之朱家河奔竄又據平利縣稟稱接
奉叅贊德楞泰札開四月初七日在房縣袁杜
地方將徐添德股匪痛加剿殺殲擒三四十人
餘匪被剿情急有由竹谿竄入平利之勢因在
楚省日久缺糧飭令平利縣寬爲籌備等語
當卽飛飭該縣任奎光迅速彙運兵糧務須不

臣

分畛域星夜趕到楚省邊界接濟一面籌撥餉銀仍派前次糧員候補知府徐兆伯縣丞羅應庚兼程馳往安爲支應至各路大局情形高見奇一股據報僅存四百餘人殘敗已極其伍懷志一股分竄各處老林日惟採食野菜野笋更屬十分窮蹙均不難指日殲除惟冉學勝一股恃其騾馬甚多亡命奔竄巧避大兵現在各路

兇圍數日內一經見仗自必易於得手再臣接

經畧知會將馬五并伊子馬秉太伊姪馬秉明

僞元帥劉良珍押至漢中交臣審辦臣欽奉

諭旨立即監提馬五等加以極刑據該犯等將積年

滋擾及戕害大員歷歷供吐當將馬五馬秉明

劉良珍綁赴市曹令兵役等逐細轢割並將馬

秉太同時處斬一面當場安設被害各員牌位

將馬五等所首剖心並前次剖存高三首級排

列供獻

臣

親率文武各員公同奠祭以慰忠魂

而抒衆憤奏入

上命軍機大臣傳諭陸有仁曰現在額勒登保剿辦
冉學勝一股已逼過渭河南岸德楞泰追剿徐添
德入陝功屆垂成所需軍火糧餉均關緊要陸有
仁務當督飭局員上緊運供源源接濟毋稍缺乏

又據奏審辦馬五供稱嘉慶三年以前曾戕害都
統阿爾薩朗公惠倫副都統豐紳布等罪大惡極
實爲覆載所不容陸有仁業將該逆嚮割示衆並
設位祭奠被害各員軍營咸所聞知而其家屬在
京城者尙未目覩仍著將該逆首級用木籠裝貯
卽行解赴京師俟奏到時再行派員帶至阿爾薩
朗惠倫豐紳布墳前傳齊伊二家子孫致祭後再

將該逆首級眼同挫碎以慰忠魂而抒衆憤

同日窩星額表行簡奏言

臣等奉

命赴陝犒師由寶雞入棧凡經行之鳳縣留壩褒城

南鄭城固洋縣西鄉等處皆連歲賊匪奔竄之

地官兵戰伐之場

臣

等周歷地勢訪察打仗情

形畧可得其梗概自用兵以來嘉慶三年以前

老師糜餉久在

聖明洞鑒之中四年以後諸將知所凜遵尙屬認真
剿辦然彼時賊匪股數尙多每股人數復衆是
以動致需時本年入春後賊股情形不但較之
四五兩年極爲衰敗卽較上年秋冬時更形減
少其所以未能卽就殄滅者蓋緣剿辦大股之
賊易於見功剿辦小股之賊難於措手當官兵
乘勝追擊之時賊匪潰逃或百餘人或數十人

鑽入老林翻山越嶺於密箐石罅內攀援而登
無立足施展之處卽趨健官兵不能緊躡追殺
及至覓途繞道思爲截剿之計遠近旣殊遂落
賊匪之後而分逃賊匪熟習山徑於兵力不及
之處仍復嘯聚屯集肆其裹脅又得苟延殘喘
臣等前聞經畧額勒登保言及有欲平賊匪先
保居民之語實爲得要現在額勒登保刊有條

約力行築寨結堡之法撫臣陸有仁亦趕緊經
理此法一行寨內多一民卽山內少一賊將來
敗竄匪徒無人可裹無食可掠不遭擒獲卽自
散亡此大功之可計曰告成者也現在陝省賊
匪冉學勝一股人數較多額勒登保親往剿辦
高二餘匪一股派交慶成伍懷志一股派交穆
克登布分投剿辦必能得手其川楚邊界一帶

臣等雖未前往目擊然聞川省寨堡堅固居民
奮勇如賊匪在川境紮營附近寨內居民百十
成羣乘夜下寨劫營賊匪驚惶無從駐足僅在
邊境摸樁此則止須搜捕無庸大費兵力楚境
之龍苟等逆人數稍衆然多係烏合裹脅之人
非高馬等逆兇狡異常習於戰鬥者比因向來
未經官兵痛剿似覺猖狂已有叅贊德楞泰前

往必能打散惟徐添德一股係舊日著名首惡
股內習教者多亦甚熟於山徑今有德楞泰在
楚可以就近兼顧將來額勒登保將冉逆等股
辦竣後騰出兵力由川陝邊境一帶乘勝而前
直指興安鄖陽等處與德楞泰大兵會合自可

一鼓蕩平

臣

等未嫻軍務然竊揣情形叅酌與

論秋冬以內似可收戡定之功至經畧額勒登

保忠勇素著其感

恩爲

國之心實屬殫竭血忱不遺餘力且馭將辦事持

正無私誠如

聖諭人無間言叅贊德楞泰_臣等未經會晤聞其熟

習軍務實能奮勇打仗近日操守亦甚收斂再

_臣等面奉